

STJÓRNARTÍÐINDI A 1 — 1977

10. janúar 1977.

1

Nr. 1.

FORSETABRÉF

um að Alþingi skuli koma saman til framhaldsfunda.

FORSETI ÍSLANDS

gjörir kunnugt:

Ég hef ákveðið samkvæmt tillögu forsætisráðherra, að Alþingi skuli koma saman til framhaldsfunda mánudaginn 24. janúar 1977 kl. 14.00.

Gjört í Reykjavík, 10. janúar 1977.

Kristján Eldjárn.

(L. S.)

Geir Hallgrímsson.

4. mars 1977.

Nr. 2.

AUGLÝSING

um staðfestingu forseta Íslands á breytingu á reglugerð fyrir Háskóla Íslands
nr. 76/1958 með áorðnum breytingum.

Forseti Íslands féllst hinn 4. mars 1977 á tillögu menntamálaráðherra um að staðfesta eftirfarandi breytingu á reglugerð nr. 76, 17. júní 1958, fyrir Háskóla Íslands með áorðnum breytingum.

1. gr.

51. gr. a verði 51. gr.

Við 51. gr. bætist 5. tl., er nefnist námsnefndir og hljóði svo:

Við hverja kennslugrein skal starfa ráðgefandi námsnefnd, sem jafnmargir kennarar og stúdentar eiga sæti í. Kennarar, þar með taldir stundakennarar, og stúdentar í hverri grein kjósa fulltrúa hvor í sínu lagi í upphafi hvers námsárs.

Hlutverk námsnefnda er:

- að gera tillögur til deildarráðs um námsefni í hverri grein að höfðu samráði við greinarkennara,
- að gera tillögur til deildarráðs um skiptingu kennslugreina í prófbætti og mat þeirra til eininga, ennfremur í hvaða röð prófbættir skulu teknir og hverjir þeirra séu skyldunámsefni í kennslugrein,
- að semja umsagnir um tillögur, er þeim berast og varða bæði kennara og stúdentar og lúta að námsskipan viðkomandi greinar,
- að skipuleggja námsráðgjöf.

A 1

2. gr.

51. gr. b verði 52. gr. og orðist svo:

1) Kennsla og nám

Kennsla. Í heimspekideild skal kennt:

a) Til B. A.-prófs (baccalaureatus artium):

Almenn bókmenntafræði, almenn málvísindi, danska, enska, finnska, franska, gríska, heimspeki, íslenska, latína, norska, rússneska, sagnfræði, spænska, sænska og þýska.

b) Til cand. mag. prófs (candidatus magisterii):

Enska, íslenskar bókmenntir, íslensk málfræði og sagnfræði.

c) Til bacc. philol. isl. prófs (baccalaureatus philologiae islandicae):

Íslenska fyrir erlenda stúdenta.

Heimspekideild semur áætlun um, hvaða námsgreinar í a-lið þurfi að taka upp í b-lið og yfirlit um þörf á kennslukröftum. Heimspekideild er heimilt að standa fyrir námskeiðum til endurmenntunar fyrir þá, sem lokið hafa fullnaðarprófi í kennslugreinum hennar.

Deildarráð tekur nánari ákvörðun um nám í hverri einstakri grein að fengnum tillögum námsnefndar. Deildarráði er heimilt að samþykkja, að hluti náms í grein felist í námi við erlendan háskóla. Skal námsefni nánar lýst í kennsluskrá og námsskrám greinanna, sem greinarkennarar skulu leggja fyrir námsnefnd, en hún fjalla um og senda deildarráði tillögur sínar til samþykkis fyrir lok aprílmánaðar ár hvert.

Ef sérstakir erfiðleikar eru á kennslu í einhverjum kennslugreinum, getur deildarráð ákveðið, að þær skuli ekki kenndar. Stúdentar, sem lokið hafa einum prófbætti í kennslugrein, eiga rétt á að ljúka 30 e í greininni.

2) Námseiningar

Nám í heimspekideild skal vegið í einingum (e), og skal ársnám talið 30 e. Við gerð kennsluskrár skal við það miðað, að stúdent þurfi ekki að sækja fleiri kennslustundir en 12 á viku þegar frá eru taldir æfingatímar, sem ekki krefjast undirbúnings.

Til B. A.-prófs er krafist minnst 90 e að viðbættum heimspekilegum forspjallsvísindum samkvæmt 39. gr. a þessarar reglugerðar (3 e), en til cand. mag. prófs er krafist B. A.-prófs að viðbættum 60 e eða samtals 150 e.

3) Prófbættir og samval greina

Sérhver kennslugrein skiptist í prófbætti. Deildarráð ákveður að fengnum tillögum frá námsnefnd í greininni skiptingu kennslugreina í prófbætti og vægi þeirra í einingum, ennfremur í hvaða röð prófbættir skulu teknir og hverjir þeirra séu skyldunámsefni í kennslugrein. Þó skulu almenn málvísindi og bókmenntafræði vera skyldupættir í tungumálum. Prófpáttur skal vera að jafnaði 5 e eða margfeldi af 5 e. Þó má deildarráð veita undanþágu frá þessu. Eigi má reikna prófpátt nema einu sinni í samanlögðum einingafjölda stúdents.

4) Námstími

Kennslu til B. A.-prófs skal hagað þannig, að stúdent sé unnt að ljúka námi á þremur árum og kennslu til cand. mag. prófs þannig, að stúdent sé unnt að ljúka námi á tveimur árum að loknu B. A. prófi. Sýni stúdent engan árangur í námi í meira en þrjú ár samfellt, er deildarráði heimilt að má nafn hans af stúdentatali.

Kennslu til prófs í íslensku fyrir erlenda stúdenta skal hagað þannig, að unnt sé að ljúka námi á tveim árum.

3. gr.

52. gr. verði 53. gr. og hljóði svo:

B. A.-próf.

Til B. A.-prófs velur stúdent sér aðalgrein úr námsgreinum, sem upp eru taldar í 52. gr. 1, a-lið, og tekur í henni minnst 60 e. Stúdent skal og velja sér aukagrein úr þessum námsgreinum og ber að taka í henni minnst 30 e. Stúdent er heimilt að sækja aukagrein til annarrar deildar með samþykki deildarráðs. Heimilt er að ákveða, að hluti aðalgreinar eða aukagreinar séu valfrjálsir prófbættir. Heimilt er stúdent í samráði við greinarkennara að sækja prófbætti til annarra deilda. Skyld er, að einn prófbáttur til B. A.-prófs felist í samningu minnst einnar heimaritgerðar. Þó má deildarráð veita undanþágu frá þeirri reglu.

Cand. mag. próf.

Að loknu B. A.-prófi er stúdent heimilt að ganga undir cand. mag. próf í grein, sem talin er upp í 52. gr. 1, b-lið, hafi hann lokið minnst 60 e í sömu grein til B. A.-prófs. Deildarráði er þó heimilt að samþykkja, að B. A.-próf með 60 e í námsgrein, sem er náskyld cand. mag.-grein, ásamt 30 e í cand. mag.-greininni, veiti aðgang að cand. mag. námi í grein.

Aðgang að cand. mag. námi í íslenskum bókmenntum eiga þeir sem lokið hafa B. A.-prófi í íslensku sem aðalgrein eða í almennri bókmenntafræði sem aðalgrein og íslensku sem aukagrein. Aðgang að cand. mag. námi í íslenskri málfræði veitir B. A.-próf í íslensku sem aðalgrein eða í almennum málvísindum sem aðalgrein og íslensku sem aukagrein.

Námsefni skiptist í prófbætti, sem stúdent velur í samráði við kennara sína. Deildarráð ákveður að fengnum tillögum námsnefnda, hverjir skuli vera prófbættir í cand. mag. prófi.

Heimilt er að velja prófbætti allt að 15 e úr öðrum skyldum greinum í samráði við greinarkennara. Ritgerðarefni velur stúdent einnig í samráði við kennara sína og skal ritgerðin vega minnst 15 e. Heimilt er, að ritgerð samin innan átta daga tímamarka komi í stað prófs í prófbætti.

Bacc. philol. isl. próf.

Til prófs í íslensku fyrir erlenda stúdenta er krafist minnst 60 e. Deildarráð ákveður nánar vægi prófbátta og námsefni hvers þáttar að fengnum tillögum námsnefndar og kennaranna í íslensku. Heimilt er með samþykki hlutaðeigandi kennara, að ritgerð samin innan átta daga tímamarka komi í stað prófs í prófbætti. Deildarráði er heimilt að veita stúdent undanþágu frá einstökum prófbáttum, ef sérstaklega stendur á. Deildarráð velur fjóra menn úr hópi kennara í íslensku, er standi fyrir prófum ásamt kennurum í bacc. philol. isl. náminu.

4. gr.

54. gr. orðist svo:

Próf og einkunnir.

1) Námsmat felst í skriflegum og/eða munnlegum prófum, æfingaverkefnum eða heimaritgerðum eftir samkomulagi kennara og stúdenta. Fyrirkomulag prófa er háð samþykki deildarforseta. Próf skulu að jafnaði haldin í misserislok, en greinarkennurum er heimilt að halda próf á öðrum tíma í samráði við stúdenta. Sjúkrapróf skulu að jafnaði haldin þrem vikum eftir eiginlegan próftíma.

Hafi stúdent ekki staðist próf í prófbætti, er honum heimilt að endurtaka það innan árs. Enginn má þó þreyta próf í sama prófbætti oftari en tvisvar án sérstakrar undanþágu deildarráðs. Einkunnir skal skrá í heilum tölum frá 0—10. Til þess að

standast próf verður stúdent að hafa hlotið minnst einkunnina 5 í prófpætti. Gefa skal einkunn fyrir hvern prófpátt um sig, en meðaleinkunn hvernar kennslugreinar skal vera vegið meðaltal prófpáttaeinkunna.

Meðaleinkunnir reiknast með einum aukastaf. Einkunn 9,0—10 er ágætiseinkunn, 7,3—8,9 er I. einkunn, 6,0—7,2 er II. einkunn og 5,0—5,9 er III. einkunn.

2) Ákvæði til bráðabirgða.

Nú óskar stúdent, sem þegar er skráður í deildina, að vera brautskráður samkvæmt ákvæðum þessarar reglugerðar, skal deildarráð þá vega til prófpáttar og eininga þau próf sem hann hefur lokið samkvæmt eldri reglugerð.

5. gr.

55. gr. a. c. og d. falli brott.

55. gr. b.

Til þess að öðlast kennsluréttindi að lögum skal B. A. prófsmaður í heimspeki-deild (sjá 53. gr.) ljúka til viðbótar prófi í uppeldis- og kennslufræðum samkvæmt 92. gr.

..... Á sama hátt þurfa kandidatar að ljúka þessu prófi til að öðlast kennsluréttindi að lögum.

6. gr.

Reglugerðarbreyting þessi öðlast gildi 15. júlí 1977.

Gjört í Reykjavík 4. mars 1977.

Kristján Eldjárn.

(L. S.)

Vilhjálmur Hjálmarsson.